



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

22. Kalenderwoche – ab 29. Mai 2011

Schohnzeit

Was mor als Mänsch dorweeschn so alles midmachn muss... mid sisch selbor! Isch meene, da duds mir ja villeischd noch gahr nisch ma so schleschd gehn... mid mir! - isch bin so rein körborlich noch ganz guhd beisam! Ooch geisdisch! Wobei - da is meine Gudste deilweise eenor andoren Meinung. Die meend manschma - wenn se off misch beese is -, isch däde schon langsam vorkalkn. Wenss nisch Alzheimer is! - sachd se. Abor das gloobsch nisch. Isch un Alzheimer! Nee, mei Gedäschdnis dud noch fungsjoniern wie... wie... äh, wie was gleisch?

Nee, es heeßd ja ooch: Währ nischd risgierd, kommd nisch nach Alzheimer! Odor war dähr Schbruch mid Waldheim?

Egahl! Ansonsdn bin isch eischendlich mid mir noch ganz zufriedn. Ma im Vorgleisch ooch mid annre, die rischdich krank sin un so. Un drozdähm - mei Körbor dud misch immor widdor mid irschend eim Bleedsinn ieborraschn! Momendahn - e Färsnschborn! Ja, e Schborn an dor Färse! So e Bleedsinn! Zu was soll denne sowas guhd sein?!

Okeeh, wenssde e Reidor bisd... e Joggeeh... da kannsde deem Bfährd villeischd de Schborn gähm... mid dähm Schborn... - abor was willsde sonsd mid eim Schborn an dor Färse? Wähm soll isch de Schborn gähm? Meine Gudste däde sisch das jednfalls nisch gefalln lassn. Also, isch meene... womeeschlich so in indiehme Siduadsjohnen... äh... wenn mir... äh... jedzde bin isch gedanklich e bißl abgerudschd. Nee, was isch sachn wollde... - dähr Färsnschborn... -

un dähr dud ja beim Loofn ooch noch weh! Ja, daderdursch habsch ja erschd von dor Egsisdenz von

dähm Schborn was gemärgd. Sähn dusde da nischd an dor Färse. Das is ja ooch e reladief kleenor Schborn. Wose misch dann ma geröndscht ham, had sisch rausgeschdelld - ungefähr 10 Millimedor groß! Abor gwähln dud misch das Ding, wie als wenns 10 Zentimedor sein dädn!

Ja, nu humbl isch rum. Un grisch Beschdraltung. Uldraschall mid Gombischdrom! Abor dähr Färsnschborn is hardnäggsch - dähr gehd nisch weg! Ooch de Einlachs dun noch nisch anschlachs.

Nee, keene Schlibbeinlachs! Einlachs in de Schuhe! Gäschn dähn Schborn! Ja, abor wozu is dähr ieborhaubd erschdema gekomm? Das is ja das, was isch misch frache!

Isch meene, irschendwie is doch de Naduhr so offgebaud, dass alles irschendwie een Sinn ham dud - fiehr de Fordbflanzung... fiehr de Erhaltung dor Ard... ehm fiehr de Evoludsjohn! Un wenn sisch was endwiggeln dud, was nisch gebrauchd wird, dann dud das abschdärm. Abor so e Färsnschborn endwiggeld sisch dodahl sinnlos. Un dud nisch abschdärm. Odor had dähr doch een Sinn? Villeischd... damid isch nisch mähr so emsich bin? Villeischd is das eene Ard nadiehrliche Bremse? Damid isch offs Aldor hin e bißl ruischor drähdn du? Das kennde sein! Ja!

Isch währ ma meinor Gudstn vorsischdhalbor sachn, dass misch e bißl mähr schohnen muss. Misch un mein Schborn.

Eduard Sachsenmeyer